

## *ASO FARAILE, 17 SETEMA 2021*

*Na nofoia e le Fofoga Fetalai le Nofoa i le itula e 9:29 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

Ia, ou te iloa o lea ua tea i lagi le tatou taulaga, ua faafofoga foi le Atua i le tatou faamoemoe i leni aso. E talitonu foi ua tapena e le Atua leni taeao fou mo le mamalu o le tatou Palemene. E talitonu foi e le mafai ona tuulafoaiina i tatou e le Atua. O Lona alofa ma Lona agalelei e tumau pea lava pea mo i tatou uma. O lea ua tuuina atu i le Atua lo tatou faamoemoe i le aso leni. E talitonu foi, e leai ua tatou lagona ifo o i tatou uma o sui usufono filifilia o le mamalu o le atunuu. E talitonu lava ua leai lava se tasi o tatou o toe mafaufau i futia ua tuanai. Pau lava o le mea, tatou sagai mo le lumanai aua le mamalu o le Palemene aemaise foi o le tatou valaauina ma le filifiliaina o i tatou.

O le mea lea, e faatalofa atu ma faafeiloai atu i le mamalu o le Palemene.

## **TUSI FAAMAONIA O LE FILIFILIA**

E tusa ai ma aiaiga o le Fuaiupu 59(2) o le Tulafono o Faiga Palota 2019, **O A'u, TUIMALEALIFANO VAALETOA SUALAUVI II**, O Le Ao o le Malo, ua tuuina atu ai nei le Tusi Faamaonia o le Filifilia o e ua taua suafa iinei ua filifilia e avea ma Sui Usufono o le Palemene o le Malo Tutoatasi o Samoa:

- 1. TUILAEPFA Fatialofa Auelua Dr. Sailele Malielegaoi.**
- 2. LEALAILEPULE Rimoni Aiafi.**

Ma isi sui usufono o le Palemene.

**TUUIINA ATU** i lo'u nei lima i Vailele i leni aso 12 o Mati 2021.

**(Sainia): Tuimalealiifano Vaaletoa Sualauvi II**  
**O LE AO O LE MALO.**

E tusa ai ma aiaiga o le Tulafono Tumau, o le a faataatia i luga o le Laulau a Fono le faasologa o le Palemene e pei ona tuuina mai i le Tusi Faamaonia o le Filifilia.

**FAILAUTUSI:** Ou te faasilasila atu e faapea, ua ou taulimaina nei le Faasilasilaga o le Vaega Faaupufai e Puipuia Aia Tatau a Tagata po o le HRPP, o le Taitai, o le Sui Taitai, faatasi ai ma sui usufono auai.

**Vaega Faaupufai e Puipuia Aia Tatau a Tagata (HRPP)**

1. Hon TUILAEPFA Fatialofa Auelua Dr. Sailele Malielelegaoi
2. Hon LAUOFO Fonotoe Nuafesili Pierre Lauofo
3. Hon SALA Fata Lisati Pinati
4. Hon LAUTAFI Fio Selafi Purcell
5. Hon TAPUNUU Niko Lee Hang
6. Hon LOAU Solamalemalo Keneti Sio
7. Hon FAIMALOTOA Kika Stowers Ah Kau
8. Hon TUUU Anasii Leota
9. SULAMANAIA Fetaiai Tauiliili Tuivasa
10. LENATAI Victor Fafoi Tamapua
11. LEALAILEPULE Rimoni Aiafi
12. ALE Vena Ale
13. LUPEMATASILA Galumalemana Tologata Togia Tile Lei'a
14. LEAANA Ronnie Posini
15. FUAAVA Suluimalo Amataga
16. MAUU Siaso Puepuemai
17. ALAIASA Moefaaouo Malagaitutogiai Sepulona Moananu
18. PESETA Vaifou Tevagaena

**FAATAUTOINA O SUI USUFONO O LE VAEGA FAAUPUFAl E**  
**PUIPUIA AIA TATAU A TAGATA**

**FOFOGA FETALAI:** A o le i afifio mai sui usufono o le Palemene i luma o le Laulau mo Tautoga, ou te valaau atu ina ia tutulai i luga a o ou faitauina le Tulafono Laititi o Amio Tauloa Faa-Palemene.

Tutulai mai sui usufono mamalu.

## **Tulafono Laitiiti o Amio Taualoa Faa-Palemene:**

### **FAAMATALAGA O FAAMOEMOEGA:**

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae. O aiaiga autu ua taua ua faamoemoe e tuuina atu ai ni taiala ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

### **O AIAIGA AUTU:**

(1) **Faamaoni i le atunuu ma ona tagata:**

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) **Faaaloalo i Tulafono:**

E tatau i sui usufono uma ona tausisia tulafono o Samoa ma puipuia aiaiga autu o lo o i totonu o le Faavae.

(3) **Faaaloalo i Tagata uma:**

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le le faaituau; aemaise le faia o le amiotonu i taimi uma.

(4) **Faatinoga Lelei o Pule:**

E tatau i sui usufono uma ona:

(a) faatulaga a latou mataupu totino;

(b) faaaoga so o se faamatalaga ma faamatalaga uma na maua mai i o latou tofi faale-Malo; ma

(c) faatinoina o so o se malosi po o pule na maua mai i o latou Tofi faale-Malo,

mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le sui usufono lava ia, tupe faalettulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

### **Manaoga Faapitoa mo Minisita ma Isi Tagata o lo o Umia Tofi faale-Malo:**

O sui usufono uma o lo o umia tofi faa-palemene o so o se ituaiga ua manaomia e usitaia aloaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e le sui usufono so o se faaopoopoga i ana meatotino po o se faamanuiaga.

**FAASALAGA:**

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Tauloa po o e pei ona o le a fuafuaina e le Palemene.

Faafetai. Alaala mai i lalo le mamalu o sui usufono.

**FOFOGA FETALAI:** Mo le faatinoina o Tautoga, ou te valaau atu i le mamalu o sui usufono ina ia afifio mai i le Laulau e taitoalima (5) e amata atu i lou itu tauagavale seia maea sui usufono o le Vaega Faaupufai e Puipuia Aia Tatau a Tagata.

**TAUTOGA O LE LOTO FAAMAONI**

“O Au..... ou te tauto i le Atua e ona le malosi uma lava o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuaina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te Au.

**ISI FAASILASILAGA A LE FOFOGA FETALAI**

**FOFOGA FETALAI:** Siitia ia i paga o le tupu mavae ma mauga o le utaga tofofi le maualuga o sa ma faiga o le Maota nei, o le Malae o le Faautugatagi a le Atunuu, a o le malae tauee foi na saili ai i le Atua Silisili Ese le filemu ma le saolotoga o Samoa. O Samoa o le ao e mamala, a o le ua na faalanumaaveave aua e sapi i lana tu ae tiu i lana aga. O sa foi ia ma faiga ua maea ona mamanu faatiti ina ua luga lalo i le toala fanau o le faasinomaga na mavaeaina. Ou te tu lilia i faga ae matau i le alatapu ina ne i pei o le toafa o Taua. Ae alaala ia le toa ma talitaliaai le pule leaga e faigata le malae tauee ma le sa e agiagia ma faasavili i paia asaasagata o le taeao ma le aso.

I paia faale-Malo i le afio o le Afioga i Le Ao Mamalu o le Malo ma le Masiofo, le afio o le Afioga i le Sui o le Fono a Sui Tofia ma le faletua, afio o lau Afioga i le Palemia ae a le mamalu o le Kapeneta.

Afio lau Afioga i le Faamasino Sili ma le mamalu o le Faamasinoga. E faigata o ou paia faaleaganuu i le afifio o Aiga ma Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ae le vaea foi le falaooto aua le fale na ula ma Malaetele, e faigata le Laau na Amotasi, Tootoo o le Faleula ma upu i le Manuatele ma le tapuaiga ia Sua ma le Vaifanua, Fofu ma Aitulagi, Saole ma Saleaamua ma le Launiu Saelua ma le nofo a Maopu.

Le ee tapuai mai o Faauluuluga o Ekalesia Kerisiano e fia i Samoa ma le aufaigaluega tofofi o le Talalelei. O Samoa ua potopoto i le Maota i Tiafau nei, o lele ua laga mauga talimalama ae lofia mauga taliutu. O le agaga faafetai ae i le Atua o lele ua malama i uluauma ae tautino le vanimonimo i Lona alofa ma Lona agalelei ua sao ma uli ai le faamoemoe ma lavasiga sa tatou lalafo i le Atua o lo o faavae ai Samoa.

Tau ia o se laolao se i ou sulaina le tofaga lalaga. Ou te manatu foi o le taeao lava ma le aso na saunia e le Atua. E momoli atu le faafetai ma le faamalo a le Nofoa i lau Afioga i le Taitai ma le Vaega Faaupufai e Puipuia Aia Tatau a Tagata. Faamalo le faatoatoa ma le faapalepale. Ua faia lava e le Alii lenei aso mo lo tatou valaauina. O se aso o le a mau pea i le talafaasolopito o lau Palemene o se tautaualemau a le Nofoa e avea ia lenei aso e galo ai le tuanai, tatou matau pea ia i sailiga Malo a tuua ma matua ua lalago mai i atutia na faavae ai lenei Palemene. Avea ia lenei taeao e fai ma molimau o le ta fefaamagaloi. O upu e masani ai le atunuu, “Afai ua sala uta, ia tonu tai, afai foi ua sala fafo, o fale lava na mafua ai ona maua le alofa.” Sagai ane ai o le tai aua lo tatou valaauina. Tautai le Atua i le tatou folau faa-Palemene i lenei Paeaiga.

Le tapuaiga a Samoa i ona tulaga faalupe ma ona tafa e fia, ua faamalo faafetai i lou titi faitama, faafetai tatalo. O oe lava o le lupe na moefao i lana fanau ona o le alofa. Ua papa tumuai ina ua malie le ao na faasavali i Tanumaleu. Ua malie foi le papa na faatolotolo ai le tama e pei o le muafetalai i le toala fanau o Salemuliaga. Pau lava o lea, afai ua i ai se lape o lau Palemene e afua mai i le amataga o lau faiga filifiliga, matou te faamalulu atu. Ia tofa i le Atua lou finagalo, faatafea ia so matou faatamala, ma ia soloia le efuefu i le tomai tauvao e osi ai so matou toilalo, pe afai ua teitei peau i so matou vaivai, aua e poto lava le tautai ae le atoa atu i le liu o lona sa.

Foi mai lea o upu i le Nofoa, le paia o le Palemene, se i o tatou aoao matagi ma utu i le liu lo tatou sa, ina ne i matagia le tatou folauga, ma ia foai mai le lagi le tofa poto i le paia o sui usufono uma o lenei Palemene.

Le Alii e, e tasi le mea ua ou ole atu ai ia te oe, o le mea lava ou te saili atu ai, ia ou nofo i lou fale i aso uma o lou ola. Aua e te faalilo au i lou fale apitaga i le aso vale. Soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga a le Fofoga Fetalai.*

**FOFOGA FETALAI:** Ia, o lea ua matau atu ua tulai mai lau Afioga i le Taitai o le Vaega Faaupufai.

**Susuga Hon Tuilaepa Dr. Sailele Malielegaoi (Taitai o le Vaega Faaupufai e Puipuia Aia Tatau a Tagata):** Lau Afioga i le Fofoga Fetalai, faapea foi le paia maualuga o le tatou Maota nei, afio o le Afioga i le Palemia ma le Kapeneta, faapea foi sui usufono mamalu, ou te faaoioi pe mafai ona fai sina au faamatalaga...

**FOFOGA FETALAI:** Ia, lau Afioga i le Taitai o le Vaega Faaupufai e Puipuia Aia Tatau a Tagata, ia o le avanoa e moomia lava lo tatou agai i luma lau Afioga, ina ia faatea mea ua tuanai ae tatou alo i luma le tatou foe aua le manuia o le atunuu. Ia, ma le agaga faaaloalo.

**Susuga Hon TUILAEPa Dr. SAILELE MALIELEGAOI:** Lau Afioga i le Fofoga Fetalai faapea foi lau Afioga i le Palemia ma lau Kapeneta ma lena Itu o le Maota, afifio foi sui o lenei Vaega Faaupufai o lenei Itu o le tatou Maota nei, faapea le paia maualuga o Ofisa Sili o Pulega o Matagaluega, aemaise foi aiga o lo o mafai ona potopoto mai e molimauina lenei taeao fou. Ou te tulai atu ma le agaga faaaloalo o se avanoa lenei ou te momoli atu ai le faamalo i lau Afioga e tusa ai ma lou tofiga, o oe lava o le Fofoga Fetalai o le Palemene, o le faatumutumuga o le Vaega lenei o le Tafatolu, o oe foi e faatama atu i ai le Maota nei.

E momoli atu le faamalo i lenei taeao fou i le tatou talosaga i le Atua. Ou te manatu ua atoa uma ai i ina le agaga atoa e tatau ona taoto ai a tatou galuega, faapea foi ma le mamalu o le tatou Maota nei.

Faamalo i lau Afioga i le Palemia le faatoatoa faapea foi lau Kapeneta i galuega sa faatino i lenei foi vaitau, talu mai le aso na tofia ai outou e avea ma Malo o le tatou atunuu, le Malo o Samoa. Faamalo le galulue.

Ou te momoli foi le faamalo i le tapuaiga a Samoa i ona tulaga faalupe, amata atu ia i le afio o le Afioga i Le Ao Mamalu, faapea foi le Sui o le Fono a Sui Tofia, ae tainane le tapuaiga i le Faamasino Sili ma le latou foi Matagaluega o alii ma tamaitai faamasino.

O paia lava ia e faasino i le tapuaiga a Samoa i ona tulaga faalupea i le afifio o Aiga ma latou Tama, o Tama foi ma o latou Aiga, Tumua ma Pule, Ituau ma Alataua, Aiga i le Tai ma le Vaa o Fonoti. Ae matua lava le tuu i le aufaigaluega paia a le Atua o lo o latou faanonomanu aua se manuia o Samoa.

E faapea foi ona ou faapai atu i le tapuaiga i le la Itu o tatou faigamalo e lua o Tutuila ma Manua. I le afio o le Kovana Sili faapea foi lana Kapeneta, le afio o le Faamasino Sili, le Fofoga Fetalai ma le Peresetene o Maota e Lua Faitulafono. O paia lava ia e faasino i le Faleagafulu ma le nofo a Maopu, tainane le afifio o Faatuiolemotu, Tootoo o le Faleula ma upu i le Manuatele. O paia atoa ia o Samoa i Sasae faapea foi lo tatou atunuu o lo o latou faanonomanu ma tapuai mai o tatou faiva a manaia, aua le atiaaina o le tatou atunuu.

Ou te faatalofa atu foi i le paia o le afaigaluega mamalu a lo tatou Malo i alii ma tamaitai o lo o latou tautuaina le Malo, o ai lava le Malo e tulai mai i le foe o le sa o Samoa latou te galulue i le po ma le ao e tusa ai ma Tulafono ua uma ona faataoto o le amiotonu.

E faapea foi ona matou faapai atu i aiga ma Samoa uma o lo o ee ma papaaao i atunuu i fafo e saili ai le manuia au i luma o latou fanau, faafetai le lagolago mai pea i aso o le manino faapea foi ma aso o puapuaga ai Samoa e pei foi o le taimi lenei o lo o feagai Samoa ma le tele foi o faafatiatamai, o faamai, ma le aafia atoa o le tatou tamaoaiga. O paia atoa ia e fia oooo atu i ai se faafetai, ona o le latou tapuaiga leleoa i o tatou faiva.

Ua uma ona tusiaao le tatou atunuu ia i tatou tatou te omai i totonu o le Maota lenei tatou te nopiai ai ma faatino o tatou tiute i le tulaga o le faataoto o faiga faavae ma Tulafono e manuia ai le atunuu atoa. O upu foi e masani ai le Palemene lenei, e le milia faauu a tatou upu. E oo loa ina faasoa le tamaoaiga o Samoa, e leai se leo e motu i tua. A o le a lava le tetele o pesega, e matua lava i le oo.

I le fia masina talu ona maea ai le faiga filifiliga a le tatou atunuu, e tele lava feeseeseaiga na tulai mai, a o uiga lava ia, e alu alu lava ona toafilemu lea. Ma ou te talitonu foi o le mitamitaga lea ia i tatou i le matau mai a atunuu o le lalolagi i nei masina o fai ai finauga, ae tumau pea le filemu o Samoa. Aisea? E leaga ua atoa ma malu le puipuiga a tatou tu ma aganuu e alii ma faipule, o latou o matai na tofia e le Atua e pulea Samoa. Ae a le lagolago a le afaigaluega paia a le Atua e tatalo i le po ma le ao ina ia liligi mai pea e le tatou Matai Sili faamanuiaga e auala mai i mafauauga lelei ma auala eseese e manuia ai lo tatou atunuu. I le matau mai fafo, e ofo, ofo i le tele o nei masina, ae o lo o faapea lava ona tumau le toafilemu o Samoa, e leai lava se mea o faaletonu, a o lea lava e faaauu finauga, o aga ia o le soifua. E i ai lava le faitau eseese ae alu alu lava maua le toafilemu.

O le taeao la lenei o le taeao o le Atua, sa tatou faatalitali uma i ai na te foai mai le laolao ina ia faatino a tatou galuega e tataua ona fai. O le ala lea o le fiafia ma le sagisagi a lenei foi Vaega. E tele lava i latou e le malamalama i itu ia. O le aso lau Afioga i le Fofoga Fetalai na faia ai le faaiuga a le Faamasinoga, o le a lava le faitau eseese, sa usitaia e au ma le faigamalo. E leai se isi laasaga i tua atu o le laasaga lena, o le lagolago a le Vaega lenei i le iuga ua taoto ai le finagalo o le Faamasinoga. O upu a au na fai i le aso

lea, “Fiame, le Malo lena, le Malo lena, alo i outou faiva, o le a avatu le matou lagolago i tulaga masani e masani ai tatou i le avatu aumai, ae matua lava i le oo.”

Lau Afioga i le Fofoga Fetalai, sa o tatou feiloai foi, ia ma avatu foi le matou lagolago. Ia atonu sa i ai sina faitau eseese, ia ae o lea ua faatino i le aso. Ou te taofi o le aso lenei na fai e le Atua e tatou te fiafia ai. O le feau foi lea e alu atu i totonu o le Maota lenei. E le gata i lo tatou atunuu ae faapena foi i atunuu o lo o tuutuu mai o latou tauau e lagolago mai i lo tatou le tagolima. O le feau lea ua avatu, leai o Samoa o le atunuu e filemu. O le atunuu e tasi le talitonuga i le Atua o lo o faavae ai Samoa.

O le Maota foi lenei ma le Palemene, o le Palemene ua Samoa atoa ia i latou ua i ai i le Pulega ua na o matai e faia tonu lea ua saofafai i totonu o lo tatou Maota nei. O le a avatu le matou lagolago, avatu le matou lagolago, avatu foi ma le tuualalo. O le tuualalo lea e le mafai ona tuua. Ia aua o aga lava ia faa-Palemene. E le fou foi, ia aemaise aso sa mafuta ai foi i tatou o lo o i ina ma iinei, e leai lava ni mea e faaletonu sa o tatou faia. E tasi lava le lagona e tautua si o tatou atunuu o lo o tapuai mai o tatou faiva.

O le matou upu lena lau Afioga i le Fofoga Fetalai, o le lagolago lena o le feau foi lea i lo tatou atunuu atoa, toa pea le tai ona o le Maota lenei, o lo o liliu ai le tofa ma le faautaga oooo aua le manuia o Samoa i le agai atu i le lumanai. E tumau pea le atunuu lenei i le filemu.

Ia faamanuia mai le Atua, sagai ane ai o le tai, e le gata i lau Afioga i le Fofoga Fetalai faapea foi lau Afioga i le Palemia ma le Kapeneta. Ia utupupuina fulu o le segaula, ia faasosofia moegaluaga. Maua le tofa lelei ina ia taoto lelei fuafuaga mo le agai i luma o le tatou atunuu. Ia i ai foi le Atua i le mea nei, i taimi uma e tatou te lufilufia ai tonu fai mo le manuia auiluma o Samoa.

O lea ua taoto upu o le tautoga, e le o se tautoga e fai i le tutunoa, o le tautoga i le Suafa mamalu o le Atua i Lana Tusi Paia o lea ua tofua tatou ma le Tusi e faamanatu ai pea lenei aso o le a tatou alofaiva e faatino le tatou tautoga i le faamaoni. Faamanuia mai le Atua i lo tatou Maota nei, faamanuia foi le Atua i le tapuaiga a Samoa i ona tulaga faalupe, ae ia ou ola i le alofa o le Atua. Soifua.

*Na faaaliala le agaga fiafia o le Maota i le patipati o latou aao i le maea ai o le Saunoaga a le Taitai o le Vaega Faaupufai e Puipuia Aia Tatau a Tagata.*

**FOFOGA FETALAI:** Ia lau Afioga i le Palemia, ia sau saunoaga aua foi le saunoaga a le Taitai o le Vaega Faaupufai e Puipuia Aia Tatau a Tagata.

**Afioga Hon FIAME NAOMI MATAAFA (Palemia):** Faafetai i lau Afioga i le Fofoga Fetalai mo le avanoa. Ma e ou te muai piinama i le faafetai



siitia i lenei taeao aemaise foi i le lagiina o le pese e faaopoopo i le tatalo ma le mau i le Atua. Ou te faafetai foi i lau Afioga e tusa ai ma lou tala avei o lenei taeao i le Malae i Tiafau i le faamoemoe ma le auga o lenei taeao, o le sauniga e faatautaina ai, sui usufono mamalu o le Maota Fono o Samoa, i Afioga i sui usufono i lenei itu o le malu, le Afioga i le Taitai ma sui usufono o le HRPP. Ia ona o lea foi ua o tatou nonofo i totonu o le Maota o le itu e agaia le Malo.

Ou te manatu lau Afioga o paia ma mamalu o le taeao ma le aso, o lenei ua e maea tapena. O lea foi ua saunoa le Afioga i le Taitai o le Vaega Faaupufai le Susuga ia Tuilaepa, ua faapena foi ona faapai i paia ma mamalu ia, ia aemaise o le tapuaiga e le gata i tafa o le Malo, ia aemaise o le tapuaiga a Samoa, i ona tulaga faalupe ia faapea le aiga Sa Levi. O lo o faapena ona molimoli atu Samoa i le Atua, ina ia faapea ona faamalutia ma alofagia ma tausia pea, i Lona alofa ma Lona agalelei.

Ou te tulai atu e faaopoopo i le agaga o le faafetai, ua amata mea mai ai lau Afioga i le Nofoa aua o oe e ou le malae lenei. Ma ou faaopoopo i le saunoaga matagofie a le Afioga ia Tuilaepa. Ma e moni au, o se taeao taua lenei i le Talafaasolopito o upu fai a lo tatou atunuu. Ia e ui lava i lo tatou faigamalaga, saunoa le Susuga ia Tuilaepa ua faitau masina talu ona fai le filifiliga a le atunuu, ma soua foi le tatou faigamalaga, ia ae moni ai lava le upu, *“Pe lutia i Puava, ae mapu i Fagalele”* i le alofa ma le agalelei o le Atua.

O le faafetai e le mafai ona faaitiitia, aemaise o le tapuaiga i so o se tafa o le tatou atunuu. Ma e moni lava saunoaga o lenei taeao, e maeu le alofa ma le agalelei o le Atua, o lo o tatou molimauina pea i le toafilemu o si o tatou atunuu. E moni lava lea, o Samoa ma lana tu ma lana aga. O le a lea? O Samoa ma lona faatuatua i le Atua, e faavae i ai lona Malo. Ae ou te faapea atu lau Afioga i le Fofoga Fetalai, ma lenei faatasiga taua, o ia mea, o lo o tau i le pule o le Tulafono na tapenaina e outou tuua ma o tatou matua, ua momoli mai ai tatou i lenei taeao.

Avea lenei avanoa ou te avatu ai le faamalo i lenei itu o le Maota, e tusa ai ma le finauina o le tatou faigapalota, ia ma le tulai mai o sui o itumalo, e pei foi o lea itu o le Maota. E faapito augafa sa matou faamalo, i sui usufono fou o le Maota. Faamalo le finau, faamalo le tauatai. Ia ia aveia pea lo tatou valaauina, e poupouina ai le faamoemoe o le atinae o Samoa ina ia manuia. Ia faapena foi ia outou Afioga i toe ulutaia o le Maota. O le mea lava lea e matagofie ai, ua o tatou taunuu mai i le lona XVII o Palemene o le Malo o Samoa, ae o lea lava e tuutuu faasolo lo tatou faamoemoe. Soloai atu nisi o sui usufono o le atunuu, ae soloai mai nisi e faaauau le tautua mo Samoa ma lona manuia.

Ia e le umi sa matou faamatalaga, lau Afioga i le Fofoga Fetalai, tau lava ina o matou faaopoopo atu i saunoaga i lenei taeao i lau Afioga, faapea le saunoaga a le Susuga ia Tuilaepa, o le agaga o le faafetai. Ma e faaiu atu ai

au upu e faapea, i le fesili foi lea, o le a le finagalo o le Atua i le mea e tatou te faia? Fai mai e a? Ia o tatou faia le amiotonu. Ia naunau i le alofa, ma ia feoi ma lou Atua ma le loto faamaualalo. O le amiotonu o le faimea sao. O le alofa o le amanaia ma le faataua e i ai le taeao lenei. Ua o tatou faafesagai, sui usufono o le atunuu, lotomauualalo lau Afioga i le Fofoga Fetalai. Ia o tatou iloa, o le a lo tatou tofi? Ae e i ai le pule e sili ia i tatou, o le Atua lea o lo o Faavae i ai le Malo o Samoa.

Ia o le matou upu lea, ia manuia tele ia fuafuaga a le Palemene, faafetai ua amata ona faamaopopo mai ia le tino o le Palemene, i le isi foi itu lea o le Tafatolu o le Faigamalo. Talosia le faamoemoe o nisi o itumalo, o le a toe foi atu mo latou filifiliga, sau se taeao ma se malama, atoa tino o le tama i le nofoia o nofoa o le Palemene.

Ia manuia lau Afioga i le Taitai o lena itu o le Maota, manuia lau Afioga i le Fofoga Fetalai. Manuia lenei potopotoga, soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga a le Afioga i le Palemia.*

**FOFOGA FETALAI:** E le toe faasilia se upu a le Nofoa, o lea ua malele lau Afioga i le Palemia e talifuaitau foi aua le saunoaga ma le tanoa i le Afioga i le Taitai aua le Vaega Faaupufai e Puipuia Aia Tatau a Tagata.

Ou te talitonu foi o lea ua fetau fola, ia ma ua fusia foi lenei aso i lo tatou faamoemoe, o le aso ua o tatou fealofani ai ma o tatou galulue faatasi, ia aua lo tatou valaauina.

O le mea lea ia faamalo saunoa, o lea foi ua faafofoga ma le totoa le paia o le Maota, ia ae a le faafofogaaga a Samoa, o lea ua silafia e Samoa, leai o lea ua agai i luma le tatou Faigamalo, ia ma lo tatou tiute ma le galuega, tautua lo tatou atunuu.

O le mea lea, ia o tatou tutulai, se i usu se tatou pese lea fai ai se tatou tatalo. Tulai.

**PESE 356:**

Lo ta nuu ua ou fanau ai  
Ua lelei oe i le vasa e  
Ua e maua mai luga  
O le tofi aoga  
    Samoana, ala mai  
    Fai ai nei le faafetai  
    I le Pule ia maua ai  
    O lou nuu i le vasa.

**TATALO:**

Le Atua Paia e lo matou Tama e faavavau, ua e faafogaina feofofoaiga a ou Taitai, aemaise foi o lenei aso, o se aso ua fusia faatasi ai Taitai o Lou atunuu i le fealofani ma le galulue faatasi.

Le Alii e, e te faia lava mea lelei ma mea silisili mo Lau fanau, ua e faafogaina foi ia finagalo faaalua o matou Taitai, ia o le agaga lena o Lau Afio, ua toto i loto ma faamoemoe o Au auauna ua avea ma Taitai o Lou atunuu, ia aemaise foi tapuaiga tatalo o si o matou atunuu le Alii e.

O le matou tatalo le Alii e ia i ai pea Au faamanuiaga, i le Paia o Lau Palemene nei, aemasie foi o le tapuaiga a si o matou atunuu. Ae tumau maia i luga o Lau Palemene ma Lou atunuu ma Lau fanau uma o le lalolagi le manuia ma le filemu o oe lo matou Tama, le alofa Silisili Ese o lo matou Alii ma lo matou Faaola, mafutaga faifaipea ma Lou lava Agaga Paia, nei seia oo i le faavavau, faavavau lava, Amene.

Ia alaala mai i lalo.

*Na tolopo Taulumaga a le Fono Aoaio Faitulafono i le itula e 10:30 i le taeao seia aulia le itula e 9:30 i le taeao o le Aso Gafua, 20 Setema 2021.*